



Ineqi Kielsen,
Inatsisartunut ilaasortaq
Inatsisartut
/MAANI

Kalaallit Nunaata Kujataani saarullit pillugit § 37 naapertorlugu apeqqummut nr. 2015-171-imut akissut

Inatsisartut Suleriaasianni § 37, imm. 1 naapertorlugu aalisarnermut tunngasunik Naalakkersuisunut apeqquteqaateqarputit. Apeqqutit uannut akineqartussanngortinneqarsimapput.

16072015
Suliap normua. 2015-116407
All. nr. 2014633

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanoq.gl
www.naalakkersuisut.gl

Apeqqutit:

1. Nunatta kujataani saarullinniarnermi tulaassisusaaqatitaaneq qanoq nakkutigineqarpa?
2. Naalakkersuisut aalajangersimanerpaat tulaassisusaaqatitaanermi suliarinneqqiisarnissaq atortinneqassasoq?

Akissutit:

1-imut) Kalaallit Nunaanni Aalisarsinnaanermut Akuersissutinik Nakkutilliisoqarfik (KANUAANA) Arktisk Kommando suleqatigalugu sinerissamat qanittumi avataasiorlunilu aalisarnermi tamanik nakkutilliisuvoq. Taamaammattaaq KANUAANA-p tulaassisusaaqatitaanerup malinneqarnissaa nakkutigisaraa. KANUAANA-p nalinginnaasumik nakkutigisaraa aalisakkat tunitsivimmut tulaanneqartussat pillugit akuersissummi piumasaqaatit annertussutsinik aalisakkallu suunerinik aalisarnermi angallammi allattaavinni paasissutissanut sanilliuttarlugit. KANUAANA-p tamakku Kalaallit Nunaanni tunitsivinnut angallatinit tunineqartut annertussusiinut sanilliuttarpai. Taamaalilluni tulaassisusaaqatitaanermik nakkutilliineq aalisarnerni allani tulaassisusaaqatitaanermik nakkutilliinermiit allaanerungilaq. Nakkutilliineq marloqiusanngorlugu avinneqarsinnaavoq ilaatigut imminnut naammattunngortittunut.

- KANUAANA-mi allaffissornikkut nakkutilliineq, tunisanik pisiarineqartunillu nalunaarutigineqartunik nakkutilliinertalik. Tamakkununga ilanngunneqassaaq IUU-mik(IUU: kalaallisut; unioqquitsilluni, aqunneqanngitsumik nalunaaruteqartaranilu aalisarneq.) uppersaasiisarnermik taaneqartartukut nunanut allanut tunineqartunik atuuttussanngortitsisarneq, tassani nunanut allanut tunineqartut pisiarineqarsimasunut sanilliunneqartarlutik.
- Umiarsualivimmut tikinnermi tulaassinermik nakkutilliineq angallatip umiarsualivimmut tikinneranut atatillugu takusaalluni nakkutilliineruvoq. Angallatini aalisarnermik nakkutilliisuusarput aalisarnermik nakkutilliisut. Imaani inatsisinik unioqquitsinerujunnartut imaluunniit pissusissamisuunngitsut allat nakkutilliisut KANUAANA-mut

nalunaarutigisarpaat. Nunalinnermut atatillugu KANUAANA-p inatsisunik unioqquitsinerit malitseqartittarpai imaluunniit aammattaaq Arktisk Kommandomut paasisutissanik ingerlatitseqqissinnaalluni.

Nakkutilliinnermut atatillugu inatsisunik unioqquitsisoqartoq paasineqarpat suliat Aalisarnermut, Piniarnermut Nunalerinnermullu Naalackersuisoqarfimmi inatsisilerinnermut immikkoortartaqarfimmut tunniunneqartarput pisariaqassatillugu taassuma politiit peqatigalugit suliaq ingerlateqqittarmagu.

2-mut) Ullumikkut sinerissamut qanittumi avataanilu saarullittassiissutit tulaanneqartussaataapput. Maannakkuugallartorli piumasaqaateqartoqanngilaq qanoq annertutigisumik saarullit aalisakkerivinni suliarineqartassanersut, tassa pisassiissutit tulaanneqartussaagaangata.

Taamaammat avatasiorluni aalisarnermi Kalaallit Nunaata Kujataani ingerlatseqatigiiffinnut marlunnet pisassiissutit tunniunneqarnissaat toqqarneqarpoq, taakku periarfissaqarmata saarullit tunisassiarinissaannut taamaalillutillu suliffissanik pilersitsinissamut. Arctic Prime Fisheries ApS ukiut kingullit ingerlaneranni Kalaallit Nunaata Kujataani nunami aalisakkerivimminni tunisassiorsinnaassutsiminnik annertusaanikuupput Taamaalillutillu ilaatigut saarullinnik tisanikkut Nanortalimmi Qaqortumilu amerlanerusunik suliffissaqalersitsisimallutik. Siorna Narsaq Seafood pisassinneqarpoq Alluitsup Paanut tarajortikkanik tunisassiassanik tulaassisussaataaalluni. Ukioq manna Narsaq Seafood taamatut tarajortikkanik tunisassiornerminik Narsamut nuussiniarluni aallartissimavoq. Naatsorsuutigineqarpoq suliffissuaq tunisassiorfigineqarnissaminut piariissasoq augustip naalernerani. Tamatuma tungaanut Narsaq Seafood Royal Greenlandip Narsami tunisassiorfianut tunioraagallassaaq. Taamaaliornerli aqqiigallarninnaavoq sulisunut 30-t missaanniittunut suliffissaqalersitsisoq.

Naalackersuisuttaaq Kalaallit Nunaata Kitaani saarullinnik 7.000 tonsinik misileraalluni aalisarneq aallartippaat, taakku tamakkerlugit tulaassassaanerisa saniatigut aammattaaq tisaneqartussaataaassallutik. Tamatumunnga pissutaarpiarpoq nalitunerulersitsinissat suliffissaqartitsinerunissallu qulakkeerneqarnissaat. Taamatut pisassiinnermut atatillugu pisassiissutit ilaat tamakkuninnga suliaqartunut ingerlasussanngortinneqarput Kalaallit Nunaata Kujataani nunami aalisakkerivinni saarullinnik pisiortortunut tisasartunullu.

Naalackersuisut pisassiissuteqartoqaraangat suliniutinillu nutaanik akuersissuteqartoqassagaangat Kalaallit Nunaanni tamarmi annertunerusumik suliarinneqqaartarneq suliffissaqartitsinerlu soqutigisariuassavaat. Tamakkununnga tunngasut uatsinnut pingaaruteqartorujussuupput sulissutiguarniarpagullu. Kalaallit Nunaata Kujataani ajornartorsiutaasut ilisimavagut taamaammallu tamakkununnga tunngasut annertuumik aallunniarpagut. Aammattaaq Kommune Kujalliuup ikerinnarsiortunik aalisarnermut inuttaasinnaasunik allattuilluni ingerlatseqatigiiffinnut nassiussuisimanera tapersorsorparput.

Inussiarnersumik inuulluaqqusillunga

Karl-Kristian Kruse